



Saksframlegg

Endringar i inndeling i lensmanns- og politistasjonsdistrikt og tenestestadar i Vest Politidistrikt -Klage på vedtak

Rådmannen sitt framlegg:

Fjaler kommunestyre sluttar seg til innhaldet i klaga slik den går fram av saksutgreiinga.

Vedlegg i saka:

03.03.2017	Endring i inndeling i lensmanns- og politistasjonsdisktrikt og tenestestader i Vest politidistrikt	158307
03.03.2017	Vedlegg åpningstider	157478

Saksutgreiing:

Kva sak gjeld:

Politidirektoratet si avgjerd for kommunar som blir råka av ny tenestestruktur kan påklagast til justis- og beredskapsdepartementet i medhald av forskrift 2016-06-22-815. Frist for å klage er sett til 10. mars 2017.

Klaga skal vere skriftleg og begrunna, og skal seie noko om kva endringar i avgjerda som kommunen ønskjer eller om kommunen ønskjer avgjerda heilt eller delvis oppheva på grunn av tilhøve ved sakshandsaminga.

Saksutgreiing:

Fjaler kommune har saman med nabokommunane Askvoll og Hyllestad, deltatt aktivt i prosessen med politireforma. Kommunane har lenge sett at dagens organisering ikkje er fullverdig eller god med tanke på innbyjarane sin tryggleik. Særleg knyter dette seg til vakt og beredskap utanom lensmannskontoret si opningstid. Som i mange andre små kommunar med store avstandar til politiet si lokalisering for vakt og beredskap, opplever vi eit fråverande politi på ettermiddag, kveld, natt, helg og høgtid. Vi ser også at lokale lensmannskontor kan verte sårbare ved sjukdom og ferieavvikling. Av den grunn har vi hatt ei konstruktiv, open og positiv haldning til Politireforma/Nærpolitireforma. Vi har utelukkande sett den som ei mogelegheit til forbetring, og har lagt stor vekt på å spele på lag.

Vest politidistrikt har følgt opp kravet til informasjon til- og dialog med kommunane, og har synt velvilje til å møte kommunane også utanom dei faste styringsgruppemøta som har vore.

Kommunane Fjaler, Askvoll og Hyllestad har opplevd eit godt samarbeid med lokale lensmenn i regionen (Askvoll, Fjaler, Hyllestad og Førde) og Vest Politidistrikt gjennom prosessen. Vi har vore samde om at vi kan slå saman dei 3 lensmannskontora vi har i dag, dersom vi får ei betre vakt og beredskapsordning gjennom heile døgnet.

Fjaler kommune er svært nøgd med dialogen vi har med vår lokale lensmann, og opplever låg terskel for kontakt begge vegar.

Fjaler kommune finn ikkje grunn til å klage på prosessen som har vore eller organiseringa av framtidig struktur.

Når vi likevel vel å klage er det grunngjeve med uro kring vakt og beredskap og innhaldet i det nye lensmannskontoret.

Vakt og beredskap:

Vi ser ikkje ut frå den nye organiseringa eit tydeleg pålegg om at vakt og beredskap skal bli vesentleg betre enn dagens organisering. Vaktsamarbeidet i tenesteeininga ser ut til å bli vidareført som i dag, men med færre tenestestadar. Med dette som utgangspunkt har vi erfaringar som tilseier at vår kommune/region også i det vidare vil få mangefull vakt og beredskap utanom kontortid.

Intensjonen i Nærpolitireforma er at vi skal kunne forvente eit meir synleg og tilgjengeleg politi også ute i distriktskommunane.

Vi vil minne om at driftseininga Sunnfjord er svært stor i utstrekning og har krevjande geografi. Avstanden til tenestestaden Førde og til andre tenestestadar innanfor eininga er så stor at vi ikkje ser korleis krava til responstider kan bli innfridd for vår del. Vi opplever innhaldet som lite forpliktande for kommunar og område som fell utanom 90% kravet. Vi har ei reell uro for at vår kommune og regionen vil bli ein del av den 10% som ikkje vil oppleve forbetingar med den nye organiseringa av tenestestadar og tenesteeiningar. Dersom det einaste vi oppnår er å slå saman dei 3 lensmannskontora, finn vi stor grunn for å klage på den nye organiseringa.

Vi understrekar følgjande tekst:

Politikontaktene ved tjenesteenhetene eller beredskapskontakten ved de nye geografiske enhetene vil få i oppdrag å utarbeide lokale planer for hvordan politipatruljen raskt kan ta seg frem til steder med vanskelig tilkomst, slik at målene for responstid opprettholdes. Fra politimesteren sin side er det en forutsetning at politiet sine lokale beredskapsplaner som angår kommunene blir presentert i de nye politirådene, og videre at politiet lokalt følger opp samarbeid med lokale beredskapsaktører.

Fjaler kommune opprettheld kravet om heildøgns vakt og beredskap innanfor regionen Askvoll, Fjaler og Hyllestad.

Vi opprettheld kravet om at tenestestaden Dale får utgjere eit eige vaktområde.